

ربيع مروة

نَشْرُ العظام

سبتمبر 24, 2021



Ali Cherri, from the "Dead Inside" series, watercolor. 2021

الحلم اللي ما حلمتو ١ :

حلمت إني عم أحصي عدد العظام اللي بجسمي، وإذُ لقيتهم ناقصين عظمة.

بالأول اعتقدت إنو أكيد غَاطت بالعدّ.

لهيك رجعت عدّهم من جديد، بس هالمرة لقيت عضمّتين ناقصين.

هالشي خلاني أبتسم كوني كنت مأكّد تمامًا إنو هالشي مش ممكن يحصل.

مستحيل.

قررت عدّهم مرّة ثالثة ، وللمفاجأة ، كان في ثلاث عظام ناقصين.

ما كنت عم بقدر صدّق ...

قلت أكيد في شي خطأ عم ببصير معي أثناء العدّ .

لهيك قلت بعدّهم للمرة الرابعة ولكن هالمرة ببطء شديد، عظمة عظمة وبتأني ...

وإدّ بيطلع في أربع عظام ناقصين.

صُعِقت.

قررت عدّهم للمرة الخامسة والسادسة والسابعة وبكل مرة كان فيه عظمة عم تنقص.

خفت كثير وانرعبت، وما عرفت شو لازم أعمل. كنت خايف إنو أرجع كرّر هالعملية لأنو صرت شبه أكيد إنو إزا ضلّيت عم عيد وعيد وعيد العَدّ، بالنهاية حَ أفقد كل عظامي .

لهيك وقفت. وما عدت أحصيتن .

بس بعرف هالأ إنو بجسمي فيه عالقيلة سبع عظام مفقودين.

ورشة الإعمار التي لا تنتهي:

عادةً، لما فيق ما بتذكر أحلامي. بس في أصوات بتضلها علقانة براسي. أصوات ما كانوا إلها علاقة بالأحلام يللي حلمتها، ومع أني ما بتذكر أحلامي، بس بعرف إنو ما إلها علاقة. الأصوات اللي بتذكرها هي أصوات ضجيج جايي من جُوا جسمي، ودايمًا نفس الأصوات بس مع تعديلات وتنوعات مختلفة، كأنها جايي من نفس التيمة. أصوات تكسير، جرف، صوت مطرقة، تهبيط، ردم، تركيب، تلحيم، منشار حديد، مبرد، صوت حجار عم تندرج، كومبريسور، خرّ برّ، خبيط، لبيد، خرششة، ححفة... كأنها أصوات ورشة إعمار أو ورشة دمار أو الاتنين سوا. ورشة عم بتصير بقلب جسمي وأنا نايم. والغريب إنو كل ما فتح عيوني، تختفي الأصوات وما بيبقى منها إلا الصدى تبعها عم يطن براسي .

وأصعب شي لما جرّب قوم من التخت، بصيروا عضامي يطلّعوا أصوات قوية وغريبة، كأن هاي أول مرة عم يتحركوا فيها. بيطلقوا وبيزقوا وبيجفّوا ع بعض وطبعاً مع وجع هائل وألم رهيب .

لما جَلِس عالتخت كأنو هاي أوّل مرة بجَلِس فيها بحياتي. لما أوقف كأنو هاي أوّل مرة بوقف. لما بمشي كأنو هاي أوّل مرة بمشي. وهيك كل الحركات كأنو أول مرة عم قوم فيها. وكل يوم لازم إني أرجع أتعلم من جديد كل الحركات اللي مفروض إني بعرفها منيح وعادةً بعملها يومياً. هاي الحركات يللي منسميها روتينية. يعني بتصير شغلتي وعملي كل النهار كيف روض جسمي الغريب عني وأعمل منه إنسان أليف.

نعم! كل يوم لازم أتعلم من جديد كيف أوقف، أمشي، أقعد، لف إجز ع إجز، لَوَح بإيدي للأصحاب، إنحني، أركض، نط وقرقص وإررع وأنتفض وإنهزم ... مرّات كنت أنجح ومرّات كنت أفشل، بس دايمًا بآخر النهار كون صرت مُنْهَك وتعبان وصار لازم نام. وهيك استسلم لنومي. ومن جديد إنزَمَى بقلب جورّة هالإعمار أو الدمار أو الاتنين سوا .

ملاحظة لا بد منها:

في صنفين من الناس، ناس عودها قاسي وناس عودها طري. أنا من الصنف الأول. عودي قاسي بس بالمعنى المباشر للكلمة مش بالمعنى المجازي. يعني عودي قاسي لكنه يابس وجاف، نَخَرُو الدود وصار فاضي من جوا ... هَشْ... أقل صدمة بتكسرو وبتخلّي يفت .

بالمعنى أنا من الصنف الثاني، من الناس يللي عودها طري بس بالمعنى المجازي. عودي طري يعني عودي ما ببلاى، ما بيتحمّل، ضعيف ولازمو سقالات تمسكوا وتهديّه وتخليه واقف في حال طق لا ما يهرّ عالارض .

صار عمري ٢٤ سنة فوق الثلاثين وبعدهو جسمي ما تعوّد عالمصاعب ولا بمقدوره يحمل أيّ ألم أو وجع ولا حتّى يحمل أيّ فرح فجائي. كل هالسنين ما قدر يتعوّد ع شي. لا الحياة وتجاربها، ولا الحروب ومصاعبها قدرت تعلمو شي ولا قدرت تقوّلوا عودو.

عودي قاسي وركبك مثل الأشواك اليابسة اللي كُتّا نحنا وزغار نكسرّها بإيدينا الناعمين، نفثّس بلّيها الفاضي عالودة الصفرا اللي نازلة نجر فيها. ولما نلقطها ناخذها نربطها طعم بفتح من حديد، ننصبو بالحقل ونموّه بالتراب ونخفيه وما يبقى مبيّن منه إلا هالدودة الصفرة اللي تصير تتلوّى من الوجع وكأنها عم ترقص رقصة إغواء للعصافير تغوي واحد منهم يجي لعندها، ينقدها بمنقاره ويعلق بين فكّي الفخ ... وبعدين يصير بين أسناننا الناصعين بياض، نحنا الزغار الحلوين والأبريا.

مقبرة جماعية:

مع الوقت صرت مقتنع إنو جواتي في مقبرة جماعية وأنا كل ليلة عم بنرمى فيها، عضامي عم يختلطوا مع عظام ناس تانيين. ومن هالعضام المكدّسة ببصير يركب شي عجيب غريب. عضمة من هون عضمة من هونيك، شي طويل شي قصير، شي رفيع شي عريض، بيركبوا ع بعض ليشكّلوا بالأخير هيكل عضمي هجين، بفيق لابسو أو لابسني... بفيق مُنْهَك... وكأني جايي من معارك وحروب ومجاعات وأوبئة ونكبات .

هذه الليلة ٢:

أثناء التنقيب داخل جسمي وعلى عمق خمسة أقدام تحت الجلد، لقيت عضام بشرية مش إلي.

حاولت أتعرف ع حدا من هالموتى لكن من دون نتيجة.

كانت العظام مختلطة ببعضها البعض.

لهيك كان من الصعب عليّ إني أعرف أيّ عظمة بتعود لهاالشخص وأيّ عظمة بتخصني أنا شخصياً.

ورغم ذلك قدرت ميّز قطعيتين أو ثلاثة بيخصّوا هيكل العظمي .

من بينها واحدة على وجه الخصوص بتعود لقدمي اليسرى.

لاحظت مثلاً وجود عظمة لمعصم ذراع من المرجح أنها تعود لرجل بالثلاثين من عمرو، يبلغ قطرها حوالي بوصتين ونصف، يعني حوالي نص بوصة أطول من معصمي.

لقيت كمان الجزء السفلي من جسم بنت زغيرة، عمرها حوالي التسع سنين، مدفون بقلب حفرة داخل ضلوعي.

لقيت عظمة لساق شاب وإيد لطفل.

عضم فك لإمرأة بالأربعينيات من عمرها وسن ذهبي واحد.

كانت العظام منثورة وين مكان بقلب جسمي.

من بينها كمان لقيت جمجمة رجل كبير بالسن عمرو حوالي ثمانين أو حتى أكبر .

بيتهبالي أنه أصيب برصاصة بالجمجمة.

الليلة، بدي أعب دور الصدغ الأيسر لهالرجل العجوز اللي من المؤكد إنو قُتل غدراً وعن سابق إصرار وتصميم.

بالرغم إني ما عندي فكرة مين بيكون ولا شو بيعمل.

إذا بدّي فكر بشخص ما ... هلاً...

يمكن بيخطر ع بالي كمال...

الليلة بدّي كون أصابعو العشرة.

إذا بدّي ففكر بشخص عزيز عليّ،

ح تكون مريم.

الليلة بدّي كون خصرها.

عم ففكر فيه وما في داعي لذكر اسمه.

ح كون جذعه.

ح مثل اكتاف الشخص اللي أعطاني هالخاتم.

كنت ماسك إيدها اليمين وكانت هاي أول مرّة بشهد فيها شخص عم يحتضر.

ح كون إيدها اليمين.

الليلة ح كون كوع إيده اليسار.

ح كون بطنها.

ح كون أحد أصابع قدميه.

ح كون صدرها.

ح كون رقبتها.

ح كون جهازو التنفسي.

ح كون جهازها العصبي.

ح كون أعضائه التناسلية.

ح كون النبض تبع قلبو.

الليلة ح كون عيون حبيبي.

الاسم :

قريت مرّة بكتاب، إنو لما بدّك تعرّف عن حالك ما تقول: أنا أسمي فلان الفلاني.

إنما قول: كان أسمي فلان الفلاني .

كم جثة أنا؟ كم قتيل أنا؟ كم موة متت؟ شو بتذكر من هالموات؟

موة بإشتباك مسلح، برصاص العسكر، بعصي شبيحة النظام، برشاشات ميلشيا السيّد وأمّثاله، برصاص فرح، برصاصة قنّاص، بقلب مظاهره، بعبوة ناسفة، بحادث مفتعل، بالغلط، بالصدفة، بانتحار، بإغتيال ...
كم موة وموة وكل مرة فيق ميت أكثر من ذي قبل.

(...)أنا كان أسمي ربيع.

١ -الحلم اللي ما حلمتو :مُقْتَطَف من “ماء بين أيادٍ ثلاث”، عرض رقص – كتابة وإخراج ربيع مروة
– كوريغرافيا ربيع مروة و Dance On Ensemble برلين. قُدّم العرض الأول في 23 نيسان 2016 في
كامبناجيل / هامبورغ.

٢ -هذه الليلة: نفس المصدر.